

WARTA 11 - 1999



MALAYSIA

Warta Kerajaan
SERI PADUKA BAGINDA
DITERBITKAN DENGAN KUASA

HIS MAJESTY'S GOVERNMENT GAZETTE
PUBLISHED BY AUTHORITY

Jil. 43
No. 9

29 April 1999

TAMBAHAN No. 28
PERUNDANGAN (B)

P.U. (B) 152.

AKTA PENTADBIRAN UNDANG-UNDANG ISLAM
(WILAYAH-WILAYAH PERSEKUTUAN) 1993

FATWA DI BAWAH SEKSYEN 34

FATWA yang dinyatakan dalam Jadual telah dibuat oleh Mufti bagi Wilayah-Wilayah Persekutuan, menurut subseksyen 34(1) Akta Pentadbiran Undang-Undang Islam (Wilayah-Wilayah Persekutuan) 1993 [*Akta 505*], selepas dibincangkan, dan adalah disiarkan menurut subseksyen itu.

Zakat Penggajian

Zakat wajib dikeluarkan ke atas pendapatan daripada penggajian seseorang Islam termasuklah apa-apa upah, gaji, elaun, imbuhan dan bonus. Oleh itu adalah wajib bagi seseorang Islam mengeluarkan zakat daripada pendapatan yang layak dikenakan zakat daripada penggajian tersebut ¹.

¹ Induk pembicaraan zakat harta berpaksi di atas kalimah *mal* (harta) dengan kata tunggal *mal* atau kata jamak *amwal*, atau kalimah *aghniya'* daripada kata tunggal *ghani*. Dalam pertimbangan ulamak usul al-fiqh dan ulum al-Quran, kalimah tersebut digolongkan ke dalam kalimah umum, berdasarkan kata jamak *amwal* dan *aghniya*.

Pelaksanaan zakat gaji di setengah negara Islam samada secara mandatori atau sukarela adalah seperti di Sudan (1983), Arab Saudi (1951), Pakistan (1980), Kuwait (1983), Kedah Darul Aman (1985) dan lain-lain lagi.

Antara dalil kewajipan zakat penggajian :

خُذْ مِنْ أَمْوَالِهِمْ صَدَقَةً تُطَهِّرُهُمْ وَتُزَكِّيهِمْ بِهَا وَصَلِّ عَلَيْهِمْ إِنَّ صَلَاتَكَ سَكَنٌ لَهُمْ وَاللَّهُ سَمِيعٌ عَلِيمٌ

Maksudnya: Ambillah zakat dari sebagian harta mereka, dengan zakat itu kamu membersihkan dan mensucikan mereka dan mendoalah untuk mereka. Sesungguhnya doa kamu itu (menjadi) ketenteraman jiwa bagi mereka. Dan Allah Maha Mendengar lagi Maha Mengetahui.

Surah al-Taubah (103)

Frasa مَا كَسَبْتُمْ merupakan lafaz yang bersifat mubhamah, iaitu tidak jelas dan samar-samar. Menurut Imam al-Suyuthi dan Imam al-Baji, kalimah al-mubhamah memberi pengertian umum. (Rujuk **Al-Itqan fi Ulum al-Qur'an** hal. 48 dan **Ihkam al-Fusul** hal. 231) Maka setiap harta yang diperoleh perlu dikenakan zakat jika telah cukup syaratnya.

Begitu juga dengan sabda Baginda SAW:

لَا زَكَاةَ فِي مَالٍ حَتَّى يَحُولَ عَلَيْهِ الْحَوْلُ

Maksudnya: Tiada kewajipan zakat ke atas suatu harta, melainkan ia telah melepasi tempoh setahun (pada milikan pemiliknya).

Riwayat Ibn Majah (1792) al-Tirmizi (632) dan Imam Malik dalam al-Muwatta' (586)

Nisab zakat pendapatan bersandarkan 85 gram emas. Kadar bayaran zakat pendapatan ialah 2.5% daripada jumlah pendapatan kasar atau pendapatan bersih.

Bertarikh pada 09hb April 1999
[JAWI/A/145; PN. (PU²) 530/II.]

DATO' HJ. MD. HASHIM BIN YAHYA,
Mufti,
Wilayah-Wilayah Persekutuan/
Federal Territories

Pakar-pakar di kalangan ulama kontemporari tidak meletakkan haul sebagai syarat wajib zakat pendapatan. Menurut Dr. Yusuf al-Qaradawi, tidak mensyaratkan haul ke atas zakat pendapatan gaji adalah atas beberapa faktor, antaranya:

i. Pertama, faktor keumuman nas-nas al-Quran yang mewajibkan orang kaya tentang kewajipan membayar zakat sebagai bukti iman dan kepatuhan seseorang kepada agama. Firman Allah SWT yang bermaksud:

“Wahai orang-orang yang beriman! Belanjakanlah (pada jalan Allah) sebahagian dari hasil usaha kamu yang baik-baik, dan sebahagian dari apa yang Kami keluarkan dari bumi untuk kamu. Dan janganlah kamu sengaja memilih yang buruk daripadanya (lalu kamu dermakan atau kamu jadikan pemberian zakat) (Al-Baqarah[2]: 267)”

ii. Mengecualikan syarat haul dalam zakat pendapatan lebih bertepatan dengan konsep keadilan. Ini kerana dengan mengenakan syarat haul, bermakna sistem zakat memberi kesempatan kepada orang-orang kaya untuk mengelakkan diri daripada membayar zakat. Hal ini terjadi apabila sesiapa yang boros berbelanja boleh menggunakan alasan tidak mempunyai wang yang berbaki dalam setahun untuk mengeluarkan zakat. Sedangkan sesiapa yang berjimat-cermat dengan menyimpan wang hasil pendapatan dalam setahun dibebankan dengan zakat. Ia sudah tentu tidak mencerminkan keadilan dalam sistem zakat itu sendiri.

Pada masa yang sama tidak mensyaratkan haul lebih meraikan maslahat umat Islam kerana setiap orang kaya akan menanggung keperluan ekonomi masyarakat. (Rujuk <http://www.zakat.com.my/info-zakat/jenis-jenis-zakat/zakat-pendapatan/>)

Muzakarah Khas Jawatankuasa Fatwa Majlis Kebangsaan Bagi Hal Ehwal Ugama Islam Malaysia yang bersidang pada 22 Jun 1997 telah membincangkan Zakat Gaji & Pendapatan Professional, dan memutuskan bahawa zakat ke atas pendapatan penggajian adalah wajib bagi orang yang layak mengeluarkan zakat.